



85  
21

I

QUÆSTIO MEDICA,  
QUOD LIBETARIIS DISPUTATIONIBUS  
*manè discutienda in Scholis Medicorum, die Forvis  
vigesima-nonâ Januarii.*

M. CLAUDIO BURLET, Doctore  
Medico, Præside.

*An interioris corporis humani infida cognitio ex Anatome?*

I.

**U**T infans parentibus, nec quidquam tale cogitantibus, quin & nolente interdum matre homo generatur, sic vivit prope nescius quâ contineatur effectione vita. Ex uteri claustris foras erumpit parvulus ac debilis, majorem posthac sensim acquirit crescendo molem vigoremque. Spiritum ut semel admisit, eo carere nequit, nisi vitæ dispendio, nec quotidianus famis sitisque sensus minorem ipsi facit ad vitam cibi potionisque necessitatem. Aër, alimenta assumpta quò abeunt? Unde pars hæc quasi melioris sortis in interiora corporis admittitur; illa infelicior excluditur? quid hæc excretorum ab assumptis varietas? unde hæc pulsus sapientia? quæ ratio somni est, quæ vigiliæ? Nec minus mirum quod adversam valetudinem facit, quàm quod secundam: idem homo frigore torpens, mox diffusio per artus calore torretur: contenta in imo ventre morbi materia mox fertur ad caput, mox è capite provolvitur ad imum ventrem: tentantur pedes frigore, illico dolet alvus & plus solito fertur: concusso ictoque validius cerebro, ventriculus convellitur, & vicissim dolores ventriculi ad cerebrum pertinent: insultus Epileptici, unde tanta toti homini perturbatio, sæpius ab extremis corporis oriuntur; quantus sit uteri cum muliere omni consensus hysterice affectiones quotidie declarant. Hæc & similia quâ organorum molitione gerantur nemo nosse se profiteatur, nisi eidem intima & exquisitor corporis fabrica patuerit. An datum hoc humanæ industriæ, meritò dubites, nedum nobis tam contigerit esse beatis. Ne quis hæc in re nimium sibi blandiatur, iis quæ & notiora ars exhibet cavebit confidere, & quâ ex parte sua in scrutando corpore aut deficere aut falli possit observatio, cautè explorabit.

II.

**Q**UISQUIS latentis naturæ cognitionem sectatur, is diligenter circumspiciat quam insitat viam, quis sit explorandi modus tutior, quæ

instrumenta quibus genuinæ rerum facies se prodant, quid arti negatum sit, quid tribuendum; decipitur Physicus dum omni artis adhibito conamine, omnia, quæ cernit effecta, soli naturæ refert accepta, nihil arti affingit: hæc sæpius addit, aut detrahit ex rebus ipsis, aut alio quovis immutat modo sic, ut quæ diu quæsitæ eruiamus, jam non naturæ, sed artis aut utriusque saltem partus exeant. Sic chymia per varios explorandi modos mixtorum principia conquirit: frustra. Non genuina illa & qualia insunt mixtis, sed ignis adulteratione prorsus alia exhibet. Quin & recentiorum Physicorum experimenta, instrumenta & superstructæ hypotheses non tam naturæ cognitionem promoverunt, quam humani ingenii in fingendo subtilitatem declararunt. At quò nobis vera corporis humani scrutatio contingeret, admirabilis hæc continuatio partium, quibus id constat, eâ arte dissolvenda esset, ut minutissima in eo perspicì posset circumscripta cujuslibet organi figura, Dædalea vasorum distributio, perlabyrinthi humorum indoles & scaturigo foret cognoscenda: nihil denique ignorandum eorum quæ natura clausit, puta singulorum positura, color, figura, magnitudo, ordo, durities, mollities, labor, contractus, processus singulorum & recessus, milleque alia ejusmodi, quæ vereor ne diu intra artis anatomicæ vota sint. Hæc quantumvis variis instrumentis adjuncta, experimentis aucta & artificum innumerorum industria locupletata sit, nusquam aperiet detegetque arcanum illud quo struitur homo artificium.

### III.

**A**NATOME ars secandi corpora prioribus Philosophis ac Medicis non ignota. Abderitam Democritum diversa secantem animalia vidisse se prodidit Hippocrates rei Anatomice nec ipse rudis. Herophilus, Erasistratus vivos homines à Regibus è carcere acceptos inciderunt, crudele. At hominum nocentium suppliciis, remedia populis innocentibus seculorum omnium quari posse existimabant. Plusquam sexcentas vivorum animalium sectiones administrasse se proficitur Galenus. Verùm quæ vix vagabatur vetustis hisce temporibus longoque seculorum tractu jacuerat ars debilis, tum robustis præsertim adolevit viribus hæc ætate nostrâ: scilicet recentioribus Geometria, Physices, Artium Mechanicarum adjunctis, novâque instrumentorum accessione plura viderunt in corporibus quæ prius abdita latebant: Ejusmodi sunt orbicularis sanguinis per universum corpus itus & reditus perennis, splendidi lymphæ canales, lactescerentes chyli ad cordis ostia commectatus, Glandularum ac tubulorum in visceribus contorti glomeris. Hæc aliaque sua recens ætas numerat inventa: Nec mirum quibus præsto sint veteribus Anatomicis partim ignota aut non usurpata instrumenta Syphones, Folliculi, Ligaturæ Microscopia &c. quorum ope exiliora persequi vasa & in tenuissimos usque penetrare viscerum recessus putant Neoterici. His profecto magnam in secando dexteritatem, ac statim non omnia tribuas. Esto sive multa protulerit nova recentior Anatomie, ac quantum plura relinquit intacta, imo quam multa corrumpit? Si dubitas, instrumentorum corpusque secandi conditionem intueri, & fateberis multam ubique insidæ & minus accuratæ demonstrationis suspensionem adesse.

**N**ULLUM est instrumentum Anatomicum quod omni ex parte prehensione careat. Cultros & scalpella, sectioni maxime dicata instrumenta, solidiores partes non admittunt, alias verò si velis attingere molliores, ejus generis sunt cerebrum, cor, pulmo, lien, hepar aliaque viscera quæ, uniformis texturæ visa, intus tamen compositissima sunt & ex innumeris organis conflata (quod maximum naturæ artificium in exiguo plura claudere) mirum si in hæcce viscerum tenuissima stamina vel acutioris scalpelli penetret acies: crassum quippe & rude instrumentum, scindit & amputat quæ integræ servari debent, quæ separanda vix attingit, quod transversum rectum, quod angulatum obtusum truncando efficit sicque genuinos in partibus characteres delet, novos exprimit. Syphonum ope, vasorum ductus, valvulæ ipsis appositæ, liquorum in partes effluxus explorantur; ab his tamen disrumpi potius, quam aperiri debilis resistentiæ vasa tenuiora vero simile est, positasque, si quæ sunt, in ipsorum cavitatibus valvulas obteri, & sæpius quantumvis liquor validè trudatur, is hæreat ad vasa carniū mole oppressa necesse est. Folliculorum penè par ratio, namque & fibrillæ viscerum tenuiores aërem validius impulsū non sustinent, ipsumque respuunt partes aut caloris absentia collapsæ aut succis concretis occlusæ. Non satis laudandus in investigando liquorum transire ligandorum vasorum usus, idem tamen in nervis fallax & infidus. Hi constructi nullum tumorem præ se ferunt, quem tamen succus nerveus, cujus existentia vel sui ipsius circuitu asstruitur, præbere debuerat. Jam verò Microscopia ipsa tibi suspecta erunt, si attenderis à minutissimo visionis centro, colores ita rebus explorandis affundi, ut quis verus earum sit nativusque color dijudicari nequeat, ac ea quæ sic interpolatis visionibus percipiuntur, fieri posse, ut discreta appareant, quæ verè unita & continua sunt. Demum circa res eminens positas fallimur radiis ad retinam usque non pertingentibus, quidni circa res microscopii ope viciniore radiis ultra retinam cœcuntibus? cautè igitur tot quæ microscopiorum acies referavit, fidem habeas. Tecumque sic statuas à curiosis istis corporis indagatoribus pleraque supposita magis, quàm demonstrata.

## V.

**H**ÆC sunt præcipuorum instrumentorum vitia; ex ipsâ verò corporis secandi parte non minora occurrunt incommoda. Corpus humanum non secatur jam nisi mortuum, eoque nomine infida semper futura est humani corporis cognitio: quoquo modo mors obtigerit, varias subeunt mutationes viscera, quibus nativa eorum facies alteretur: dum homo lucis usurâ fruitur, viscera ubique vaporibus invicem emissis, calore spirituque perfusâ quandam habent molliem, lavoremque, qui mortuo statim deperit. Quam mille exiguiora vasa spiritibus liquoribusque pervia in viventibus, obliterantur in mortuis. Veræ chylum deferentes, ductus thoracicus, lymphatica vasa usûs tam conspicui vix ab aliquot annis sese prodiderunt, imò & vix reperiuntur; quid censeas de tot aliis minoris molis partibus, quas reverâ existere probabile est, tamen industriam artificum fugiunt. Fortè quis ex vivorum animalium sectione compensare crediderit si quid nostri corporis cognitioni desit; nihilò tamen plus certitudinis meo quidem judicio expectet ex his quæ tantâ violentiâ quærentur. Ex dolore omnis perturbatur æconomia

naturalis, irrequieti quoquoersum sine ordine, sine lege feruntur spiritus, suos quandoque rumpunt cancellos, instant partes quæ subsident, aliarum tenuem delent texturam sic, ut color, labor, mollities, durities similiaque omnia talia inciso esse nequeant, qualia integro fuerunt. Si enim metu, dolore, cruditate, inedia, lassitudine, aliisque mediocribus affectionibus inviolata corpora mutantur, quantò magis interiora corporis quibus major mollities & lux ipsa nova est, sub gravissimis vulneribus, & ipsa trucidatione mutantur: ut ut tamen nullis hæc brutorum sectio occurreret reprehensionibus, homo belluis multum interest.

*Ergo interioris corporis humani insida cognitio ex anatome.*

### Domini Doctores disputaturi.

*M. Franciscus le Rat.*

*M. Josephus Thomasseau.*

*M. Germanus Preaux, Professor Regius.*

*M. Ludovicus Labbé.*

*M. Ludovicus Poirier.*

*M. Rolandus Merlet.*

*M. Andreas Enguehard, Professor Regius.*

*M. Petrus Bonnet-Bourdelot.*

*M. Franciscus Pajot, Antiquior Schola Magister.*

Proponebat Lutetiæ JOANNES GELLY, à sancto Paulo de Fœnoüilledes  
Electensis, Baccalaureus Medicus. A. R. S. H. 1693.

Apud Franciscum Muguet, Regis, & Facultatis Medicinæ  
Typographum.